

本朝分省人物考

分省人物考目錄卷之九十六

山東東昌府三

李仕魯

卽俛

郭敦

吳中

王士嘉

劉堅

劉昱

李春

馮昱

馬豫

李著

趙岩

劉忠

朱舉

郭良

魏元

張文昭

劉濂

李晟

郭鏗

周洪

謝綬

蔣昂

張雄

附黃質

敖山

梁璽

朱應昌

劉魁

附子孝

王禮

附史蘭

丁璉

蕭淵

許路

李瓚

喬通

許堂

耿明

李廷相

高顯

閻鎬

李元吉

穆孔暉

王道

許成名

宋顯章

田美

桑溥

閻閔

倪宗嶽

王應

林瓊

蘇祐

江東

田濡

郭鉉

謝國賓

許東望

張後覺

附王牧

潘龍

邵璋

張登高

鮑文縉

曹自守

雷稽古

王嘉祥

栗祁

梁承學

孫維城

孟秋

陳節亨

傅光宅

本朝京省人物考卷之九十六

山東東昌府

李仕魯

李仕魯字宗孔濮州人幼具穎資勤于問學奮志下  
帷足不窺戶外者三年胸藏賅博造詣淵沉益切尙  
友之志聞婺人朱公遷得晦翁朱子之傳千里負笈  
從之百舍重繭一見深相契合端精探究盡得其所  
學而歸值元之末季四海鼎沸烽燧壁壘相望屠城  
戰野民無寧居仕魯隱居不出以待天下之清然所  
在聲望奕奕 太祖龍潛時業已識其名矣洪武初

詔求天下有能傳朱學者所在以聞有司乃舉仕魯  
應召乘傳至京入見 上迎謂之曰吾求子久矣何  
相見之晚也仕魯對曰 陛下方以武定天下臣逢  
掖下士溺於章句不能左鞭右弭馳驅中原冀禮興  
樂成之會以文事進身故意有所待耳 上曰文武  
初無異道俎豆軍旅豈截然兩途且朕方收攬才士  
以佐太平乃以文武擇乎遂除黃州府同知仕魯曰  
臣所夙願惟欲朝夕陛前備顧問以行所學 上曰  
姑以民事試子耳仕魯乃奉 詔抵任風裁整峻政  
理寬和乘大亂之後加意撫循民之瘡殘者卹之吏

之莠政者斥之期年之後刑清訟簡民以大和用以  
治行卓異聞于 朝召拜大理寺卿律比精嚴守正  
不撓時有僧金碧峰者應對稱 上旨寵眷日隆求  
爲僧建職司仕魯曰 陛下建極之初意所祈嚮卽  
爲後世子孫天下臣民之標表奈何不崇聖學而信  
外道乎懇疏至三十章 上堅決不從仕魯曰 陛  
下旣深信其道無惑臣言之不入也願還 陛下芻  
放歸田里 上震怒命武士粹搏之立死階下

郎 俛

郎俛字抑之館陶人洪武間補縣諸生儀表魁岸行



誼高潔雅爲里人推慕許兒庄等三社頑梗不馴有司莫能治俛至反覆曉譬相率懼伏委攝縣事條平徭役凡三閱月四境稱理登太學授工部虞衡司主事遷雲南府知府所至著聲績

郭敦

郭敦字仲厚堂邑人洪武間鄉舉授戶部主事知衢州府釐正敝俗振恤窮民時郡中旱蝗敦齋三日徧禱于神大兩蝗盡漂去嘗舍內飼蠶繭成簇爲金縷如帶士民以爲德政所感狀其事于朝坐累左遷以薦召拜監察御史陞叅政言者謂敦持重有大臣體

召見陞禮部右侍郎兼少詹事進戶部尚書鎮守陝西邊陲晏然敦性平恕事至屹然不苟合雖官列六卿泊然布素沒之日子孫不能餘一錢里人傳其出關之日僅跨一騾携老蒼頭自隨云

吳中

吳中字思正武城人儀觀秀整吐音洪鬯由太學生授營州屯衛經歷永樂初陞大理寺丞少卿右都御史歷工部尚書嘗扈從北征督理軍餉改刑部持法寬平以言事繫獄洪熙初復工部進太子少保當時鼎建京城宮殿及諸陵寢皆中董役程工飭材殫力

經營一日自天壽山還召入便殿賜坐與語及歸遣  
中官至其第賜帛六百疋每宴夷使 上召中主席  
且曰使彼知我中國有人 宣宗卽位從征武定賜  
詩畫銀圖書寵遇隆于廷臣正統七年卒追封在平  
伯謚榮襄 賜祭葬中謙恭和煦善馭下吏使人各  
盡其長同列論事不合輒應以好語不甚引當否歷  
事四朝以功名終

王士嘉

王士嘉字道亨武城人年十二賦古塔詩劉中行見  
而奇之永樂初由太學生任大同山陰知縣善斷疑

獄有瞽者賈錢百緡臥城南荆樹下覺而失之訴于  
縣士嘉佯言曰此樹孽耳出城按問百姓大駭傾城  
往視因密捕其不往者訊之果服代府內藏失幣門  
戶扃鑰如故王召問士嘉士嘉視非人跡疑爲徂所  
竊乃以幣列庭伺群徂過而觀之一徂果攫去因詰  
其主皆服追還府人以爲神歷工部員外郎監饒州  
陶有清譽擢陝西布政司叅政正統初以少傅楊士  
奇薦召爲禮部右侍郎勤于稽古禮文之事關中大  
早奉命往禱輒應兩知貢舉皆得人居京邸室傾于  
雨 上命有司給材治第後致仕 上賜食給道里

費慰遣之年八十七卒命官祭葬士嘉爲人端重詳  
雅語笑不妄去就咸依古道子玉翰林院侍講

劉堅

劉堅字子固濮州人舉永樂丙戌進士授茂州知州  
課民農桑訟獄少稀以治行聞時蠻寇竊發師出數  
給餉有功茂州衛奏請立學羌民難之堅集衆羌論  
以朝廷化民成俗之意於是遣子就學及滿去羌民  
乞畱遷寧藩左長史正色匡輔王嚴重之時郡主沒  
儀賓王爽受祿如故堅請停削王怒奏堅倨慢無狀  
被逮繫獄久之得白流爽遼東尋復堅職嗣王嘉其

守法禮待益隆後以母喪歸濮卒孫明榮曾孫汝  
俱鄉貢汝立萬曆庚辰進士

劉 昱

劉昱字景陽武城人初任吏科給事中陞通政司右  
通政河南叅政英奮勇敢所至吏民畏憚改交趾從  
征時黔國公沐晟總軍務襲賊大安海口昱疑有伏  
固請駐師不聽已戰于生厥江風作賊伏兵起與尚  
書劉儁都督呂毅力戰死之雲南建表忠祠祀焉五  
世孫希稷登正德辛巳進士官戶部主事端恪攻文  
賦六世孫啓元登隆慶戊辰進士官衛輝知府清白

能世其家

李春

李春丘縣人正統三年鄉薦由刑科給事中進禮科都給事中前後上七十二疏多裨益時政封駁協衆議已巳虜犯京師大軍禦之春紀功以明稱遷光祿寺少卿天順中西南夷作亂蹂金齒廷臣薦春才轉雲南右布政協理鎮守梅忠軍事親冒矢石俘夷酋七十五人斬首五百餘級鹵獲象馬器物無算捷奏召拜禮部右侍郎仍從二品俸視光祿事已遷工部左侍郎成化初汪直用事遂乞骸骨歸卒春祿二品

一裘十餘年不易人稱爲清正君子

馮 昱

馮昱字景陽濮州人正統丁卯鄉薦卒業太學授監察御史錦衣衛指揮門達怙寵弄權數起詔獄傾擠善類舉朝側目莫敢言昱獨抗論其罪達遂伏法由是直聲震天下巡按甘肅番人例獻金佛昱峻却之陞河南按察司副使周府承奉卞某出督租縛民妻孥裸辱之民怒將爲亂昱白王王不省乃獨騎率健卒數人入府縛卞疏其罪于朝詔論如法先是河決金龍口費數萬緡不能塞昱建順導之策河患乃



息久之以老歸田居喜吟咏有和唐詩草

馬 著

馬豫中彥安臨清人正統間登進士歷官大理寺副  
已已從 駕北征土木不利跣追山谷間厲聲叱賊  
遂遇害 英廟復辟憫其忠加贈寺正錄其子遜入  
監

李 著

李著字廷光濮州人仕魯曾孫正統間鄉舉授慶陽  
同知巨寇李英爲邊患商旅不行著以計擒捕遷平  
涼府知府典學勸士料第嚴盛參將楊姓爲胡種最

獷悍恣爲不法鎮巡大臣欲除之恐激變著狀其罪于朝治之土番也哩哈逼于酋屯兵將爲亂總帥招之不下曰得平涼李父來乃降著往相率歸命又虜滿四聚衆三萬抄掠州縣上命侍郎項忠討之項檄府備熟糗千石時民竄匿山谷獨護藩府軍在城著請于王治糗如期而辦賊平項上其功遷通政使命下而卒邊人感其德立祠祀之

趙巖

趙巖堂邑人母早卒事父甚孝家貧嘗稱貸供甘膳父卒合葬建祠墓側廬居三年肖像事之旦夕上食

如生時夏大雨雹自西北來摧傷禾稼甚慘至墓而止里人異之有司上其事 詔旌表祀學宮同邑李尚質王瓘楊琮俱以孝聞

### 劉忠

劉忠字攄誠濮州人少在庠序行輩讓其敏景泰二年舉于鄉任監察御史出按浙江執憲不阿知台州府以異政聞 詔旌褒陞山西右叅政三晉薦饑民鬻聚垣曲山中省臣議發兵勦之忠爭曰是迫于饑耳可撫而下也遂單騎入山諭以禍福衆羅拜感涕明日皆散去垣曲人樹德政碑以前後勞績陞

院右副都御史巡撫榆林忠剔歷有年練于邊務至則嚴斥堠簡卒乘練材勇廣儲蓄芻牧老成持重不喜邀功塞下晏然烽燧不警守陴乘障者且忘其身之在於窮邊極塞也共相與賦從軍樂以紀一時太平之盛云久之以疾請致仕 溫旨諭留疏請愈懇 詔乘傳歸未幾卒子祭葬如制

朱舉

朱舉聊城人景泰庚午薦于鄉早歲攻苦食淡以行誼稱于宗黨性至孝母老百道承順以衰疾故兩試不上春官會母病卒慟哭殞地家人環守之多方諭

解溢米不入口者兼旬已葬身操畚鍤築墳結茅廬  
於墓側朝夕哭奠哀感路人三年白燕乳巢兔蛇馴  
擾有司具其事聞于 朝詔旌其里時同邑裴俊王  
安孫良梁瑾俱以孝聞

郭 良

郭良字克忠館陶人景泰間進士授朝邑知縣鋤梗  
噓弱植良懲奸積弊肅清流徙漸復吏民悅服薦剡  
章騰民深去後之思邑有甘棠之愛後累官光祿寺  
少卿以致政歸居家內行淳備人無間言剪榛塗而  
由夷軌喁喁焉一鄉之善人長者也以上壽終

魏元

魏元字景善朝城人天順庚辰進士擢拜禮科給事中成化中萬貴妃兄弟怙寵驕橫元疏列其罪凡七上不報元詣殿庭免冠泣諫奏雖不行而諸萬亦稍自斂戢直聲隆隆徹于禁陛矣  慈懿皇后崩議者以爲不當祔享元與給諫徐恪交章論辨會大學士彭時力主元議卒得成禮陞福建右叅政巡視海道嚴禁土人不得越海私販與島夷闌出入犯者必寘于法不稍寬假有海商齎重寶賂元元怒曰吾爲貧諸生猶不利非其有今幸貴顯何至以賈人金啗我

才高公... 卷九十六  
叱出之母卒歸葬廬墓側三年復除江西叅政卒

張文昭

張文昭字應奎平山衛人少展墓遇老父相云若異日當貴已忽不見天順癸未秋舉進士歷刑部主事員外郎中讞決疑獄著平反聲擢河南副使按察使拜僉都御史巡撫雲南貴州馭將校有恩威懷來綏輯羣夷歸心弘治初年召入協理內臺時 孝廟銳精治理百務振刷文昭叅佐風紀中外憚其威稜凡朝廷內察外計矢以至公至慎之心旌良擢異屏奸黜貪每遇一大黜陟無不懽呼而稱允當者五年丁

母憂歸時未滿四品考 上特以有撫定西南之功  
詔予之祭未幾卒于家今祀學宮

劉 濂

劉濂字宗周臨清人成化己丑進士以工部郎權稅  
蕪江清介絕俗一塵不滓諸商有江水深百尺未比  
使君清之謠陞廣西叅政適鬱林寇起兩廣三司合  
兵征剿多以妄殺見譴濂獨當一部出奇用正咸有  
紀律上功幕府獨無間言以勞勩成疾竟以不起行  
篋蕭然棺斂不具布政使舒清多方經紀其事始克  
還櫬歸里



李晟

李晟字孔陽濮州人成化己丑進士初令宜陽召授  
監察御史慷慨有經世志喜談兵尚書王恕奇其才  
力薦于朝不用乙巳虜入寇上書欲自效進所製兵  
圖當事者以舊事銜之謫曲靖府知事會有邊警廷  
臣薦其才詔改都察院照磨往叅謀大同軍事鎮巡  
器重之已遷鄖陽府同知非其志也乃上書曰臣由  
儒起家潛心韜畧三十餘年前後所著兵機等書古  
人不能遠過頃大同有事撫按薦臣禦虜而吏部  
臣撫民用臣違所長臣所製飛矢火礮馱車火傘等

器皆殫思劍造前人智慮所未及令臣當一隊出薄  
伎楫角可橫行單于之庭設謂臣無當于用乞放歸  
田里願屏居濮上以畢餘生不敢拜命當事者惡其  
語直遂予告年八十餘卒所著有六經舉要經世通  
畧平胡兵式安攘六論晟聰悟異常自比諸葛武侯  
揭膺濶視每議論旁若無人以故仕途齟齬云

郭鏜

郭鏜字子聲恩縣人登進士擢兵科給事中成化初  
郊祀甘露降大臣欲稱賀鏜力陳其不可河湟兵弗  
解奉詔經畧易置諸將事竣陳備邊三十策上感

嘉納轉都給事中陞通政司右叅議僉都御史巡撫  
宣府大同奏置平虜城宣寧等堡以備捍禦劾中官  
之憑藉不法者尋改遼東坐大同匿虜事追論奪職  
謫知射洪縣陞雲南按察司僉事時木邦孟定相讐  
鏗深入撫諭事定以疾乞歸鏗聞朗軒豁博通群籍  
尤善讀穰苴司馬兵法嘗謂其弟進士鈺曰我病緩  
汝病急可取弦韋各名其居以自警故因自號弦庵  
子

周 洪

周洪字寬夫武城人成化間進士初尹項城奏毀貴

戚店舍蝗不爲災擢監察御史屢陳時政都人憚其  
風裁時山西大饑建入粟議活民數萬以言事謫永  
寧宣撫司經歷改光山令多惠政光人立祠擢四川  
僉事後以忤權貴遂致仕

謝 綬

謝綬字朝章朝城人成化甲辰進士令任丘得民譽  
有指揮奉巡按御史之命至任丘不遜綬收下獄御  
史聞之遣兵隸繫綬任丘民數千泣訴于御史竟不  
能加害未幾擢留臺御史時內守備蔣琮怙恩恣肆  
起第鑿雨花臺綬劾下吏竟死獄中巡按兩浙織造

羅綺費錢以巨萬數奏罷之進湖廣按察司副使時  
逆瑾招權納賄惡其戇直撫往事罰穀千斛調四川  
瑾誅入爲大理少卿嘗錄囚千餘人稱不冤尋陞僉  
都御史巡撫雲中稽軍實理屯餉繕城堡逐貪暴威  
聲大振時北單于廬帳雄據塞上望風遠遁以勞瘁  
卒于邊 詔予祭諸子若孫咸以經術世其家

蔣 昺

蔣昺字克明丘縣人成化間登進士授行人司行人  
權貴州道監察御史遇事敢言當時與靈寶許進齊  
名已奉命巡鴈門關值中官汪直用事往謁者皆趨

聽昂獨長揖不屈直大怒裙疏中語矯旨廷杖謫四  
川建昌衛知事移令長洲縣有善政芝草生庭尋擢  
湖廣按察司僉事平生鯁亮以忠義自負母卒廬墓  
慈烏萬數日馴其側里人頌其完節

張雄

附黃質

張雄字鵬飛范縣人登成化乙未進士儀觀修偉銓  
部器之授吏科給事中立朝侃侃諸所敷奏咸切時  
務進本科都給事中會大臣有樹黨相攻者雄獨立  
不倚謫烏蒙縣丞同官莫敢送雄歎曰士窮見節義  
平昔握手出肺肝相示一旦臨小利害顧若路人耶

未幾移知鉤州有殊政以課最遷應天府治中病歸  
同邑人黃質弘治間進士授禮科給事中上弭變疏  
有直聲陞按察司副使

敖山

敖山字靜之莘縣人七歲補郡諸生天資英邁負氣  
自豪屢試咸屈其同儕舉山東鄉試第一登成化戊  
戌進士選庶吉士授翰林院編修陞江西提學副使  
江西故多文學山采摭經史百家之疑及古今事勢  
變故之難彙爲問目以策諸生其說先儒所未及士  
張目不能置對丁內艱服除改山西以疾歸山賦才

雄爽爲文如奔峽騰川馳放橫逸不煩刻削自合繩  
度當時與濬縣王越齊名人稱江北二傑云晚年日  
手皇極經世一編妙契邵學不傳之旨嘗夢吟詩云  
先天不肯畱人住遺下三皇五帝春旣寤吟猶在口  
逾數日卒所著有先天手冊燦然稿

梁 璽

梁璽字朝用聊城人早歲博綜善屬文登成化甲辰  
進士授南京戶部主事督中都軍儲嚴嚴漏隱歲饒  
奇贏牘報大司農貯庾粒米不以自潤前後職民曹  
者稱璽爲最事竣當代軍民上書請畱尋陞吏部考



功司員外郎未任丁內艱歸卒于家子相字惟賢鄉  
薦知杭州府新城縣鎮守中官橫索州縣相曰吾何  
忍椎民脂髓以奉奄豎獨無所齎遺有論死囚挾重  
賄納巡按御史請解相固執不聽坐罷官歸無環堵  
之宅僦居市舍授生徒自給葺修郡乘衆多其事核  
詞直孫承學登隆慶戊辰進士官按察副使曾孫衍  
祚舉人

朱應昌

朱應昌夏津人成化間進士知元城縣勸農興學剖  
決明允庭無冤滯以治行異等擢浙江道監察御史

應昌天性嚴毅不尚驚擊風采屹然內修行飭妻子咸服其化未幾卒于京士論傷之

劉

魁

附子孝

劉魁字士元高唐人成化間進士尹顛榆多勞績擢監察御史按蘇松常鎮彌盜有功淫雨害稼力請于朝蠲貸蘇門像祠之以直道左遷黃梅縣丞丁內艱歸當道屢薦不起卒于家魁天性純孝對妻孥相敬如賓凡歷官無所趨避以此偃蹇終身子孝字必先弘治初進士令獻縣徙河間奉公勤民不飭厨傳兩邑爭頌其美陞刑部主事員外郎歷陝西按察司僉

事謙斷明允綠飭儒雅卒于鳳翔郡守檢閱囊篋僅  
敝衣數襲人比之胡威父子

王

禮附史蘭

王禮朝城人質直懷義早喪父事母至孝日上食非  
手調不以進母疾藥必親嘗時密禱于神乞減其算  
以益母壽及卒勺水不入口者三日慟哭濱死葬畢  
跣足負土築室墓側勝其所曰追思以志風木之感  
三年蒔栢成林有二蛇馴擾廬畔人以爲孝感所致  
事聞旌表 詔復其家又同邑人史蘭邑諸生父  
廬塚上日僅啖米屑一盂以毀瘠卒

丁璉

丁璉字汝器聊城人成化乙酉舉人授汝寧府確山知縣縣舊隸信陽州璉以道遠多費奏改隸府士民稱便蒞任九年斷疑獄以數十牘有異政錄調直隸慶都減徭輕賦流民自占者八百戶丁內外艱復除宜陽儀真穎上所至民懷其惠以不善骫骳竟謝政歸椎祖產讓諸弟鄉評重之子孔璋登正德甲戌進士官參政曾孫懋儒登嘉靖乙丑進士官知府

蕭淵

蕭淵字文靜堂邑人父瑛鄉舉徽州通判廉靜有賢

操淵少膺家訓不慕芬華偕計京邸拒奔女不納聞者歎服登弘治庚戌進士由行人擢監察御史糾舉甚有聲出爲山西僉事以忤逆瑾謫守鄭州民婦古氏被人謀殺淵禱于神得主名抵罪流賊萬騎攻城淵授兵登陴督衆捍禦賊竟引去遷山西叅議潼關兵備副使商洛番夷作亂率兵討平之事聞璽書旌褒以疾致仕歸構桃林書屋課農教子足跡不涉公庭諸子若孫咸恂恂能世其業

許路

許路字由之平山衛人父麾鄉舉官太僕寺丞力學

篤行里中稱長者路登弘治戊辰進士爲刑部郎正  
德間諫武宗南巡廷杖嘉靖初議大禮再杖遷陝  
西副使兵備洮岷番夷數寇臨鞏路厲兵擊之前後  
斬首三百餘級招服四十族改廣西兵備賓州撫諭  
徭僮而剪其不用命者事聞賜金幣朝廷命師討  
安南莫世庸路監兵多指畫功久之病歸嘗疏格言  
于屏訓示子弟每遇朝賀雖隆寒必盛服先往垂  
白對客無惰容敦睦鄉曲弔死問疾不避風雨子孫  
彬彬以詩書顯

李瓚

李瓚字宗器濮州人世傳宋李文定後弘治間進士  
爲刑部郎陞通政司叅議以不附逆瑾出判饒州轉  
江西按察司僉事陞大理寺右少卿累官都御史巡  
撫順天經畧邊塞繕治城隍募兵設監勞積懋著憲  
臣列其事數賜白金文綺進戶部尚書致仕卒贈太  
子太保 賜祭葬如例

喬通

喬通字世亨臨清人弘治間鄉薦授河南登封教諭  
入爲國子監助教擢南京湖廣道御史初在登封召  
諸生口授五經貧不能自存者分俸周給旣拜畱臺

志操益厲江賊龍覆天等擁兵數萬侵掠郡縣通矢  
志討賊裹瘡力戰群惡次第授首未幾病亡旅櫬歸  
家蕭然四壁通勁節高標所至以宦積著稱今祀學  
宮

許堂

許堂字升之平山衛人父庠省大父于景州旅舍得  
遺金一囊追還其主里人高其義堂領弘治乙卯鄉  
薦知絳縣復除安化諸大姓山居數負租課召至庭  
下曉諭人皆感動輸者繼屬不絕以病改乾州學正  
人爲國子監助教陞晉府長史時武宗西巡諸閹



檀橫糲不利于王堂代爲草奏事解王喜甚嘉靖初  
詔加四品服致仕王手書慰問餽遺相踵于道晚歲  
神氣清瑩恍有悟于歸根復命之旨當易簣時援筆  
書曰太極圓光內先天一竅中無人得遇此獨我翫  
真空投筆而瞑

耿明

耿明字晦之館陶人登弘治丙辰進士授貴州道御  
史輦下論列無所避忌巡按雲南周行箐棘徃以遐  
徼有司多不檢露章劾奏數十人嘗慮囚有民家子  
爲妖巫魘死復甦事發巫論死有司以謀殺未果矜

之明日此輩妖術所殺不知幾何人幸發之不當宥  
亟命戮于市遠近稱快正德間逆瑾用事出知湖州  
府賑貧救災摧暴扶良以治行最超擢江西左叅政  
督餉佐兵翦除群盜功成不受賞以疾乞休甫抵里  
三月寧濠以反聞人服其明哲

李廷相

李廷相字夢弼濮州人尚書瓚之子早工文賦制義  
婉秀爲一時絕唱登弘治乙丑進士及第授翰林院  
編修操履端直不競進取正德初逆瑾擅權惡其不  
附已改兵部主事歷職方員外郎中當宗藩構亂領

部章奏事平以勞 賜文綺後瑾誅復改春坊中允  
歷翰林院學士經筵講官 武宗遊獵無度財用耗  
費廷相講百姓足君孰與不足章剴切詳晰 上爲  
感動亟稱曰真學士嘉靖初歷南京吏部侍郎陞戶  
部尚書卒謚文敏先是同郡清平人張天瑞字文祥  
天資絕人爲詩文數千言嘗信筆成篇不復檢覈人  
有難之者律詩限以百韻天瑞亦揮毫立就限者至  
供韻不及成化間及第左春坊左庶子與廷相兩人  
俱早登鼎甲居詞林有聲里人謂天瑞上人使氣不  
及廷相恬穆溫粹云

高顯

高顯字德章濮州人登弘治壬戌進士由魏縣令權戶科給事中時逆瑾用事顯首論中官蠹政害民并大學生焦芳阿附不職請罷斥直聲震天下出爲湖廣僉事從彭尚書平諸夷獠陞陝西按察司副使尋陞按察使御史嫉其亢直遂解官顯坦易惇篤臨大事不動聲色善調笑與人交披肝膽相示歲得俸輒施予卒之日發篋笥僅圖書酒具無他蓄

閻鎬

閻鎬字孟周臨清人弘治間鄉薦力學安貧事父母

孝郡守偉其志行已授饒陽縣教諭迎養學舍旦夕  
上食甚腆非遠出不去側訓迪諸生左文右行捐俸  
葺廟廡三年改教寶坻以父憂歸三日粥一溢時隆  
寒苦卧殯側因邁危疾親屬環視之鎬曰毀不滅性  
禮也不日行法以俟命乎含淚而卒

李元吉

李元吉字守正堂邑人通判雄子少負才名督學使  
者嘗携之徧誇示六郡且語人曰齊魯故多文學之  
士不及李生尋魁鄉試弘治間登進士選翰林庶吉  
士歷文選司郎中銓叙流品有平允聲廉隅嚴峻論

事務抗引是非爭大體一日同工部議開納例不合  
奮袂投筆遷右通政告歸僻居別墅凡朝紳問遺之  
牘不報于旄時過其廬輒引避嘉靖初召爲太僕  
寺卿固辭不起元吉博該群書謹繩墨檢勅族人規  
約嚴于官府蓋自束髮時雄視一世于人鮮許可白  
首英氣猶揭揭云

穆孔暉

穆孔暉字伯潛堂邑人淳懿溫恭早負文望弘治甲  
子王文成主試舉第一登乙丑進士授翰林院檢討  
正德間宦瑾擅權卿佐皆伏謁跪拜孔暉與安陽崔

銑獨長揖瑾怒矯旨調南京禮部主事瑾誅復原官  
進南京國子司業左庶子充經筵講官因摠所得懇  
惻規切嘉靖初進學士掌院以忤權相改南京尚寶  
司卿給事中葉淇上言學士某昭代淳儒留之左右  
足以裨益 聖德不聽尋遷南京太常寺卿致仕孔  
暉初工古文辭有聲已棄去研經六籍潛心聖學雖  
二氏諸書時擇其精者詳說之曰吾性原無分別相  
也久之抉去藩籬穎脫超詣嘗論心學之要曰鑑照  
妍媸而妍媸不著于鑑心應事物而事物不染于心  
自去自來隨應隨寂如鳥過空空體弗礙識者服其

妙悟平生無疾聲厲色變故粹至神氣怡然知德者  
至擬諸程伯子所著有讀易錄尚書困學諸史通編  
大學千慮居官三十年茅茨僅蔽風雨卒贈禮部侍  
郎謚文簡姪策負奇氣閱博能文自稱又玄子

王道

王道字純甫武城人未冠登鄉舉正德辛未進士選  
庶吉士時山東盜起將奉祖母避地江南疏改應天  
教授召爲吏部主事歷考功文選司郎中大學士方  
獻夫薦其學行淳正可任官僚擢春坊左諭德引疾  
固辭曰朝廷以名器爲重不輕假人以不次之官而



人臣惟義分是安當致謹于非分之獲凡三疏始得  
旨以病歸而聲望益重居一歲起遷國子監祭酒拜  
吏部右侍郎僅閱月而疾不起矣道英敏絕人精擇  
強記于書靡不究其要指已厭博反約紬繹聖經不  
欲標門戶自表著久之神解渙然自信盡破世俗拘  
攣之見所著有易詩書春秋大學億持論多前儒所  
未及兩掌胄監端軌申約六館諸生翕然向風人比  
之宋仲敏卒贈禮部尚書諡文定

許成名

許成名字思仁聊城人早歲穎異困諸生中嘗著論

見志正德辛未舉進士第四人選翰林庶吉士累試  
哀然居首賦禁中春曉詩藝林傳誦授編修歷諭德  
進侍讀學士嘉靖初上重文學之選命輔臣擇有  
才望者遂推成名陞太常寺卿掌國子監祭酒禮部  
右侍郎前後爲講官十年纂修武宗實錄大明會  
典文典麗宏偉詩工近體評者謂品在晚唐錢劉間  
書初學逸少已沉酣吳興小變之適逸飛動甚爲海  
內鑒賞天性長厚不以名位自高雖幼賤必鈞禮間  
黨親戚有急傾身營救累牘無所愛里居曠達觴詠  
自適有江左風致所著有龍石集

宋顯章

宋顯章字文光濮州人郡諸生有醇行正德辛未廬父墓流賊至伐其墓樹顯章大哭請止之賊首喑噎曰此孝子里也戒勿復遺之矢約五里內不得殘傷一木里人依之賴全活甚衆學使者高其行越格廩之辭曰吾豈敢徼虛聲奪國家養士之典累試居高等治家嚴飭儀矩御賊獲有法農桑歲事輒先奏功里人不言而化與蘇尚書祐倪御史宗嶽友善二人折節敬之顯章工草書善臨古帖詩大類唐人累舉不第卒不旬日妻辛氏自經殯側州守李緝上其事

建祠樹碑黃詹事佐作孝烈祠樂章二闕云

田美

田美字在中濮州人正德甲戌進士獨行寡交爲御史與中官齟齬出爲山西僉事時虜犯柳園美督戰馬蹶死于邊贈光祿寺少卿

桑溥

桑溥字汝公濮州人父春襄陽府推官精春秋飭法律以經術溥高才倜儻恥齷齪曲謹登正德甲戌進士初守華州民家有妖祟溥符而遣之人稱神明嘉靖癸未擢陝西按察司僉事尋以總督楊一清薦轉

固原兵備副使值虜入寇督護將士邀擊于鎮戎堡  
大破之馘五百餘級梟其酋首捷聞議陞大理寺卿  
以兄濟尚襄藩郡主改授浙江按察使會桂太宰子  
自安仁如京凌杭守溥語激而慙又監試廉知貴人  
子通關節黜之坐讒落職歸居城東構萬綠亭鑿池  
築山賦詩彈碁自娛山東副使某以事被逮溥遺百  
金爲橐餽費人頌其義子孫科第繩繩

閻 閻

閻閔字尚友臨清人鎬之子生有異稟讀書過目不  
忘年十七舉于鄉登正德丁丑進士選翰林庶吉士

授吏科給事中 世宗自藩邸入繼勅車騎由正陽門闕叩頭曰殿下未卽位不得由天子門舉朝壯其言嘉靖初大學士楊廷和以定策功進封伯又大賞迎扈諸臣闕言叙援立則威柄斂私隨從則侍御驕恐累初政之美事遂寢以劾大臣忤旨謫雲南蒙自縣丞是時史給事中道曹御史嘉俱由庶吉士一日言事並罷人稱館中三傑累官提學副使乞歸闕持論蹇諤卞急不能容人之過地方疾苦直陳剴切無所諱爲文善比事引類非關世教不以矢口初與夏文愍公同官相善已夏入相謝弗與通又數年夏趨

召再相過臨清造請竟引匿不出賦詩一章寄諷夏  
歎息而去

### 倪宗嶽

倪宗嶽字鎮卿濮州人正德辛巳進士嘉靖初以才  
器授山西道御史伏闕諫大禮廷杖尋出按真定綜  
覈有司墨吏望風解綬順德地方飛沙不田而稅勘  
明蠲除偶痰發不治巡撫某不職至自視病宗嶽出  
袖中疏草視曰吾欲露章彈公今不能矣請公更絃  
而治福此畿南生靈遂卒四郡士民哭之慟初宗嶽  
從郡人譚某受經已登薦書蹴鞠于道譚遇之召至

庭下數而杖之宗獄俯伏不出一語再拜引咎識者  
兩稱焉妻杜孺人子婦馮俱以節聞

王應

王應字德鄰朝城人父雄慈愛喜施捨每嚴冬嘗設  
煖榻招群瞽寢處其上雨雪給食應舉嘉靖壬午鄉  
試初令杞縣有能聲擢山西道御史首上君德五事  
崇聖學廣言路禮大臣遠嬖倖正綱紀皆深切時弊  
數劾大臣中貴不法京師震駭巡視三關請于桑乾  
河修長橋築敵樓以扼虜咽喉建沙河城以護衛陵  
寢識者服其遠畧按畿南四郡遇 駕南狩權貴蹂



躡地方恥不得其職自投劾去家居事兄如父邑中  
婚喪不給者賴賑濟無慮數千指闕塾城南課子授  
徒喜薦寵下輩人有註誤務相掩覆調護故人子弟  
尤厚士論多其有維持風俗之功

林 瓊

林瓊字廷獻臨清人嘉靖丙戌登進士高第授刑部  
主事天性簡澹論事依傳古義領部內章奏精察不  
苛有天文生董至者誣建昌侯謀逆書上 詔下司  
寇獄瓊廉其狀窮治無左驗力白侯枉 上怒罷瓊  
官侯卒得不誅瓊歸杜門掃迹非先聖之書不讀爲

文雄蔚淵奧善獎掖後進一時名士及門者甚衆州俗靡蕩競徵逐聲利瓊蟬蛻濁穢皜然不獲世之淄垢評者謂其磊落大節如嚴霜孤栢挺立獨秀云門人鐫其所著文曰霜栢稿

蘇祐

蘇祐字允吉別號穀原濮州人祐生時烟霧覆室三日及在襁褓或撫之晝寢忽展轉亟啼不肯卧抱而下堂屋梁斷免焉識者知其貴矣補郡庠長吏爲禮送酒方行忽大雨霹靂火光如斗一座皆驚曰是必有名聞天下者居母憂會流賊劫畧至郡父恩趣之

走避泣曰母殯在堂兒將焉往願以死守竟不避俄而寇去正德癸酉舉鄉薦嘉靖丙戌成進士授吳縣令編徭役戒奢靡三年大治以嫡母周喪去吳舟泊穀亭穀亭人夢神告曰河上有尚書至旦日視之祐舟在焉服除補東鹿邑多繫囚下車一日罷釋數千百人民有昵妾殺妻沉之井而逸者吏弗問也是日捕置之法明日革罷徭車三十兩又明日有 詔召東鹿令東鹿人語曰三日官府百年父母拜廣東道御史癸巳中丞王以奏疏過誤元日下吏祐偕諸御史論救皆得廷杖無何按宣大大同兵變討平之乙

未據江北江北大旱疏請司農金六萬賑貸符離舊  
苦於河患築石堤十里禦之人號蘇堤如杭丁酉按  
山西錄大辟減死五千餘人代還掌河南道臺法應  
擢九卿同臺忌之薦以爲江西提學副使江西士衆  
歲試日閱數百卷不數月而已徧決科第鏘銖不爽  
壬寅擢山西叅政分理鴈門三關已晉大理少卿乙  
巳拜僉都御史巡撫保定丁未進副都巡撫山西奏  
功進秩已酉入爲刑部侍郎改兵部轉左無何以所  
居官總督宣大山西軍務是秋虜犯京師率三鎮兵  
入援斬首虜數十馬牛以萬計歲寧侯鸞在邊嘗言

以首功一級官祐少子謝曰兒未嘗從軍吾又且朝  
暮罷去不敢以累將軍癸丑遷右都御史虜二十萬  
衆將入關聞報提兵馳至永安堡遇戰斬首虜四百  
有奇捷奏祭告郊廟榜示九邊晉兵部尚書蔭孫錦  
衣正千戶祐居北邊十年虜懼其威幾不近塞會總  
兵岳懋陷虜幕府者懼奏言不請兵餉樵蘇后期故  
敗本兵亦素有卻如幕府言 詔逮獄然祐實嘗乞  
餉無以難而分宜官尚書時嘗爲祐所論從中王之  
削籍爲庶人隆慶戊辰 東官立覃恩致仕家食十  
八年卒所著有孫吳子集解三關紀要法家哀集穀

原詩文草奏疏適旃瑣言等書

江東

江東字伯陽朝城人七歲能文弱冠舉嘉靖己未進士授工部主事倜儻有大畧累遷巡撫遼東總督宣大免歸南京軍變召起兵部侍郎往按治誅首惡戊午江南倭亂奉詔討平之擢南京兵部尚書改戶部時俺答圍大同右衛三月絕糧命東總督宣大齎米二萬斛往救以護兵七萬行東問曰爾行糧幾何曰七日東驚曰過期吾與若輩法當死死虜可乎令士各持火銃倍道趨進距右衛百里許晝鳴鼓發

銚夜列萬炬燭天喧傳九邊兵至虜驚遁去獲三日糧已入城報命云奉勅大同幹事畢不他言其謙恭不伐類如此壬戌虜大舉入寇東提兵急趨賊右賊不意我兵猝至夜遁出塞癸亥虜由潮河入薊抵通州張甚東督兵躡其後與賊遇將士力戰馘首百餘級事聞召遣中使勞問加太子少保賜蟒玉廕子卒于邊東精忠天植推誠御下所至人樂爲用官登八座田不益畝廬不更椽海內服其清德宿望贈少保諡恭襄

田濡字少生聊城人白晳疏眉目風標秀朗少從兄  
濬受詩登嘉靖己丑進士由行人選工科給事中疏  
請宥議禮諸臣楊慎等不報監築都城以劾中官侵  
少府錢逮下詔獄尋釋之癸巳星變陳修省六事陞  
刑科都給事中論吏部尚書汪鉉武定侯郭勲貪橫  
無狀竟用罷斥累陞南京太僕寺卿未幾請告歸里  
濡志操修潔喜緡閱圖史居官雍容嫺雅語不危而  
中裊躬飭族依倣藍田規約閨閣邃整內外秩然郡  
人服其家政年八十餘卒

郭 鉉



郭鉞字汝器平山衛人早負雋才郡守陳公儒讀其  
文異之累試冠諸生嘉靖辛卯舉山東鄉試第一數  
罷公車肆力問學敷寬善誘一時英俊樂出其門仕  
太原府推官晉諸王孫慕其名爭輸欵納交概謝不  
報爲政務在疏滌寃滯所慮囚徒咸稱不枉累官順  
天府治中歸無負郭之田冬夏僅一裘一葛菜糜自  
給早工樂府甫脫口遠邇傳誦高者足奪金元詞人  
之壘制行淳恪抑節爲恭里人賢之

謝國賓

謝國賓字思敬平山衛人早歲聰敏志行高邁母病

瘡齟齬血淋漓人稱其孝登嘉靖戊戌進士乞養歸  
杜門掃軌蒐獵群籍善古文辭人勸之仕不應間遊  
神方外招集高士揮塵竟夕几榻凝塵湛如也事兄  
嫂敬而嫉里中無少長皆慕其爲人嘗憫衛卒不勝  
股削尺籍空虛上書監司請調停諸役比于州縣議  
雖不行論者以爲石畫

許東望

許東望字應魯平山衛人嘉靖戊戌進士初令山陰  
政尚寬平民愛之如慈父入爲戶部郎嘗督江西述  
賦貴要無所假歷浙江叅議分守紹興會倭夷突擾

軍興煩費東望一切鎮以簡靜推赤心待下將卒爭  
自効柯亭龕山之捷親督矢石馘數百級同事攘其  
功僅進按察司副使嘿嘿不言累官行太僕寺卿致  
仕東望廉慈豈弟不設城府居鄉恂恂善推讓同儕  
每語侵之不校闔扉冥坐習養生家言手緝古今名  
方所著性命三編多可覽年八十餘目光炯炯燈下  
能書蠅頭細字郡人傳其少年遇仙云

張後覺

附王牧

張後覺字志仁桂平人事父母至孝居喪哀毀骨立  
三年不御私室早歲得王文成之學于顏博士鑰屏

棄舉業深思力踐雖隆冬盛暑不爐不扇久之充然  
有得嘗曰耳本天聰日本天明順帝之則何慮何管  
又曰真知是忿忿自懲真知是愆愆自窒懲忿如沸  
釜抽薪窒愆如紅爐點雪摧山填壑愈難愈遠當時  
門人孟秋趙暹趙維新獨契宗旨海內名流道荏山  
者往往紆軫請益督學鄒善郡守羅汝芳兩建書院  
集齊魯諸生其中延升席使爲都講以歲薦仕華陰  
縣訓導視邑篆起仆弭亂境內安堵歸之日士民遮  
道泣送里居教授所著有弘山教言同郡恩縣人王  
牧字汝謙已酉舉人篤志聖學與後覺友善辨析仁

體往復數千言卓有深詣官溫州府通判一介不取

潘龍

潘龍字子霖夏津人有異質日記數千言父卒產中落嘗採樵給食讀書僧舍鑿壁引燈治博士業有聲嘉靖庚子舉鄉試第一是科歷下李按察攀龍名相次人稱山東二龍云累罷春官紬繹經史爲文不競藻績談名理刺骨居嘗兀坐一編垂白伊吾至丙夜不休布袍蔬食澹如也負笈從遊者戶外之屨常滿所指授皆成名士以經術政事顯同年殷少保人相獨執故人刺投謁踞坐東鄉字少保少保擁篲布席

終身尊禮不衰人兩高之子敦復萬曆癸未進士官  
知府

邵璋

邵璋字宜卿朝城人周歲喪母及髫謁墓未嘗不痛  
哭失聲從學御史王公應以德行稱嘉靖庚子舉于  
鄉事繼母孝父年八十餘病痢甚璋卧牀下一夕數  
十起手奉溺器滌滌浣席盛暑無難色已嘗其矢苦  
喜曰父無恙也尋起後五年卒璋柴毀骨立喪儀一  
稟諸古提學袁洪愈旌其廬璋謝曰吾方抱終天之  
恨而名暇恤哉固辭不受旌知西平縣慈祥節儉卒

于官百姓歛歔罷市樹碑立祠璋清修醇行動遵幅  
尺子弟門人相觀而化邑人傳其孝廉錄

張登高

張登高字子升濮州人嘉靖辛丑進士初任蘇州府  
推官讞斷疑獄吏不敢欺擢廣西道御史按順天部  
內多中官貴戚侵奪民田登高一切繩之法覈實歸  
民涿州民訟其守于錦衣衛衛校窘守甚急登高厲  
聲曰守卽不法御史按治錦衣何得藐視令甲追攝  
百里之外輕辱長吏乎時都督陸炳掌衛事權傾中  
外登高具疏劾炳忽有鴛鴦迎拜馬首歎曰吾固知

不利于身計爲朝廷明法耳疏上詔逮榜掠幾死  
削職歸里昇行過涿百姓遮道泣送隆慶改元復原  
官陞南京尚寶司卿加太常寺少卿致仕

鮑文縉

鮑文縉字子卿臨清人七歲而孤勤學力行遵奉母  
訓撫弟文紳教愛備至一食之甘必推而分之領嘉  
靖壬子鄉薦授井陘縣知縣謀虜南窺繕治武備核  
石田之不苗者蠲其租百姓感之立生祠徵入爲戶  
部郎陞平涼府知府豪宗有事納賂乞寬假文縉固  
謝不聽嘗自稱曰吾已委質而仕身固當奉職死節



官下不復他顧矣直方寡諧所在能舉其職里居卻  
軌擁琴書自娛人謂有漢鮑司隸之風

曹自守

曹自守字伯化荏平人早孤事母至孝少聘張氏女  
女病而瞽其父請罷婚自守娶焉里人高其行登嘉  
靖已未進士令吳縣澣衣糲食三年不市一縑以治  
行最召入爲吏部主事轉員外郎檢摘詭牒吏胥無  
敢因緣爲奸所條畫選規著爲絮令籍甚公卿間太  
宰楊襄毅公丞屬意掌選難于躡次以請自守以鬚  
髮早白不樂郎署力乞外轉江西按察司副使分巡

饒南糾墨吏散客兵飭紀貞度郡邑翕然卒于官吳人嘗言曹令去邑之日僅兩蒼頭負敝篋出閭門圖畫不持也居鄉益廩廩稱德讓君子云

雷稽古

雷稽古字汝徵恩縣人嘉靖己未進士授平陽府推官讞獄有平反聲旁郡質成無虛日召拜監察御史疏上輒焚其草初按甘肅已按湖廣所察應條輒舉甚有威名隆慶間籍遼庶人產是時江陵執政陰欲啗楊麟洲田稽古拒不與曰吾安敢奪公家之利市交貴人遷南京大理丞尋轉應天徧括屬邑之藏以

佐織造秋毫不以擾民百姓德之稽古孝友鯁介田廬推畀弟姪居家矢戒五事標諸壁嚴扃鐫如官舍屏絕財利聲樂之好名位寢隆中道摧隕人以爲不究其用

王嘉祥

王嘉祥字兆興華縣人早孤稍長遇父諱日雪涕不食事伯父如父登嘉靖壬戌進士授臨晉知縣復除陳畱但飯蔬藿羹自給兩邑士民頌其廉平陞工部主事員外郎中督理營繕程工掄材中官不得乾沒縣官錢物以使事過里卒嘉祥天性謹愿所至事辦

善事母蚤莫問衣燠寒疾痛疔癢而抑搔之門無雜  
賓讌會不卜夜人問之曰吾謹奉慈訓不敢妄交游  
貪杯勺傷母之志母卒哀毀瀕死三年不酒肉每哭  
隣里感動人稱至孝

栗 祁

栗祁字子登夏津人生三歲而孤稍長爲名士嘉靖  
辛酉舉于鄉壬戌第進士授徽州府推官徽俗故黠  
好氣小不相下或聚徒格鬪或殺傷人投諸水火詣  
吏訟常十餘年不決祁謂此難以法治嘗爲好語之  
復譬之民反輸心有所感動乙丑擢南戶部主事推

稅杭州月俸之外秋毫無取轉郎中拜湖州知府平賦輕徭與民休息民無擾焉郡海水災民饑上書蠲其十之二三權會羨金一切謝絕擢山西副使秣馬訓兵修屯愛士軍中有訟僅以笞遣之曰塞卒困極一傳爰書卽三月廩立盡使當虜奈何由是所居塞整辦過于他境兩臺方交章薦北邊開府一日構小然不起時年僅四十二

### 梁承學

梁承學字師顏聊城人生六歲而孤家貧從母王宜人居攻苦誦習髫年學成十八舉省試隆慶戊辰成

進士有同姓中官用事請序族曰吾不知系所從出  
謝弗與通除陝西延安府推官讞獄平恕一日閱獄  
中囚有八歲兒投石戲誤中死七歲兒吏增兒年論  
死承學廉其狀立貫之有府卒出覓金錢照磨筭卒  
後病死吏當故勘平人律承學曰卒爲奸利非平人  
照磨筭之固當奈何中法亦減死論滿考以柄銓者  
有嫌僅擢南京工部主事改戶部時九江權稅序當  
遣承學往郎中有所善者奪之同曹咸不平承學曰  
使職等耳何必九江後所遣者竟以墨敗進員外郎  
中改雲南司專主漕政尚書欲扣漕費奏爲羨餘運

卒大譟尚書恐夜召承學具陳不可狀草疏平亭之  
卒乃安先議者以江北田荒奏遣憲臣督吏民開墾  
命承學往視狀馳至其地具得其實以報甚稱上  
旨擢陝西副使備兵鄜延再至塞上日夜按行所部  
繕治城堡修飭武備邊境大治猶賊嘯聚撫臣欲發  
兵捕承學謂皆凶歲饑寒救死不足以辱軍吏遣丞  
尉持檄往諭之賊感泣立解散會關中大侵人相食  
設法賑貸多所全活忌者反以爲救荒無策改用因  
拂衣東歸後請闕病返棹抵舍數日卒年五十五

孫維城

孫維城號衛宇丘縣人隆慶庚午舉于鄉明年成進士授濟縣知縣旋以內艱服除補太康邑俗健訟乃預爲籍記皆知其蹤迹主名有奸輒發黠風遂止尋又以外艱服除補任丘任丘當道多中貴士族城持法堅信壬午召授南御史先是江陵奪情寧國諸生吳仕期將上書譙之未發而郡丞宗武白操江都御史檟檟者江陵私人馳告梏而斃諸獄生婦爲寃書走都市哭城至首疏劾都御史及丞下吏謫戍天下快之趙公志臯等以忤江陵中考功法城疏陳謂三臣無罪上用其言立召三公復位其后皆至卿相



方是時海忠介公爲大夫亟稱之曰吾臺得孫君乃重耳已出爲松江知府改永平至則值有海警督率將吏嚴飭干楸新孤竹之祠以暇延興禮教治行皆爲第一陞山西按察副使分巡上谷益築亭障二百六十所招屬夷得其生口千餘進山西叅政進按察使虜酋安兔恃其驍健挾市城請革賞而遣譯語鬼聞嚙指曰大師知吾虛實乃獻出邊屬夷自贖進右布政夷人乞賞一餅一鬻無浮于歲積賞羨金十四萬及市租五千遷廣東左布政鎮人乃大譁督撫上書留之滿績晉右僉都御史開府榆林上莊諸酋叩

關乞款議者不敢任城疏謂不可以小費淪約示不信于外夷 朝廷從之而業以積勞成疾卒于軍郎中秦兵道劉人哭檢索中餘秩金一錠將吏無不流涕鎮人爲罷市焉城去永平時僚吏以府藏羨金致之境上笑謝弗納其去上谷口北亦然座師江陵柄政三爲邑令不通一牘塞上十年于中朝要貴亦終無所請問然其議論常依大體聞有自恃操節而繩人以爲名者亦不取也

孟秋

孟秋字子成荏平人早歲從外傳受毛詩至鄭衛輒

棄去更治尙書已聞張弘山先生講陽明之學執弟子禮受業下帷發憤慨慕前修家貧甚嘗撤屋瓦鬻之以供膏薪提學鄒公善講道濟上召與語大悅曰功利之俗孰能不波不意乃有孟生登隆慶辛未進士知昌黎縣政尙清惠萬曆初遷大理評事尋轉職方司主事守山海關是時關政久弛江陵當國選于諸曹得秋至則嚴譏察裁供億竟爲前官所忌中考功法調外陞刑部主事進尙寶司丞少卿卒秋雅志澹泊躋嚅聖真貌癯然若不勝衣遇事神閒氣定萬夫莫能奪與人交樂引其所長而覆其短晚年徧證

四方同志問學洞徹其論中和已發未發犁然有當  
于中庸之旨鄒考功元標張論德元怵讀而善之曰  
此孔門嫡派臺省交章請易名格于例未果所著有  
二明一脉經翼行于世

陳節亨

陳節亨字子安東昌衛人萬曆丙子舉于鄉悛悛如  
處女善事母試春官畢輒策蹇蹙躄冒風雨歸趨侍  
晨昏無故不去左右家貧不通謁有司一日監司行  
部召諸孝廉請爲治偕計裝節亨謝病不往聊城縣  
罪人應傅城且書縣令語曰但得陳孝廉一字吾立

釋汝其人泣請三日竟閉門弗應所居破屋頽垣日  
近午不舉炊隱几讀書自若居母喪月餘以毀卒郡  
守署其門曰獨行振俗

### 傅光宅

傅光宅字伯俊號金沙聊城人母一夕夢瑞光滿室  
寤而生曰此子必耀吾宗遂以光宅命名四歲誦詩  
十六經術通明隆慶庚午舉省試萬曆丁丑進士授  
靈寶知縣外艱闋改令吳縣拜監察御史按行二關  
薦故帥戚繼光衆論大快廟堂弗是也詔讓光宅因  
請告已還臺按浙會申救寧晉王御史劾太宰改按

陝光宅疏語侵御史大夫有阿大夫旨者下令大索  
山人得光宅舍客戍之坐註改行人司正遷南兵部  
郎中內艱服除補工部郎中內工河漕歲費不貲籌  
畫財省爲多會稅璫馬堂橫權臨清其徒鬪殺市人  
市人因焚其署光宅曰此璫所自致發難不在民也  
疏白堂激變狀請誅其記史鄭惟明附璫者謬謂光  
宅爲侵官側目視之矣己亥播酋作亂詔發兵誅吏  
部薦光宅爲郡曰當賢于十萬師至則治粟轉輸民  
皆安堵師無後憂制府李長垣謀畫多所贊決寇平  
請釋脇從全活萬計辛丑考察以能奏調成都時播

郡新置借鎮重臣乃進副使分巡遵義所部皆兵後  
多暴骨祭而瘞之遺俘畏誅小反督兵擊定以望改  
督學政甄拔名流甲辰大討前側目者乘間中之曰  
無傷也吾已日夜治裝歸矣抵舍而病以其年終于  
正寢生平慕義好施嘗置腴田五百以奉兩庠膏楮  
內外戚屬待之舉火者數十所著有巽曲吳門燕市  
蠶叢諸草夙慕方外之遊內典玄宗無不深詣

本朝分省人物考卷之九十六終